

Nowodhow an Seythen

02/12/08

An seythen yw passyes o pur dhrog rag savla Konsel Kernow.

Dalleth an seythen, yth esa pubonan ow krysi bos an konsel ow pareusi rag degemeres rewl an hyns-neyjya ha'n tanlu orth Ayrborth Kernow.

Bys y'n prys ma, an taklow na o rann RAF Sen Mawgan... mes yma an selva na ow tegea.

An towl o rag an RAF dhe ri an hyns-neyjya ha'n tanlu dhe'n konsel Kala Du.

Rag henna... res o dhe'n konsel degemeres kummys a'n CAA.

Byttegyns ny wrug an Konsel seweni y'n paperweyth - ha res o dhe'n konsel gortos bys y'n nawnjekves a vis Du.

Ytho... rag may fo an neyjennow ow pesya... res o dhe'n konsel herdhya an RAF gortos teyr seythen voy.

Mes... nyns o possybyl... ha lemmyn an ayrborth yw deges y'n seythennyow kyns Nadelik.

Dres henna... res vydh dhe'n konsel tylli rag gorra tus ynter Tewyn Bleustri hag Aberplymm, po Karesk.

Ryanair a leveris bos Konsel Kernow leun a lordens, ha ny wra dehweles dhe Gernow bys yn mis Genver.

Lemmyn yma agan eseli yn senedh Westminster ow kovyn may fo hwithrans... hag yn unn leverel bos res dhe bennow rolya.

Hwath yma tus ow kovyn mars yw tybyans da brashe Ayrborth Kernow awos defolans hag erel.

Yma towl negys dhe'n ayrborth lemmyn... hag yma chons dhe bubonan leverel aga brys war an desten.

Hemm yw hwarvos tewl neb a ros dhe Gernow drog-vri.

Dres henna, y kodh dhyn perthi kov bos treus-rians bras arall ow tos nes.

Nessa bledhen, y fydh an konsel, par dell yw lemmyn ow treus-ri dhe'n Konsel Unnik.

Mar ny yll an konsel gul treus-rians an ayrborth yn ta... eus govenek dhyn del vydh treus-rians an konsel sewen?

Nowodhow an Seythun re ros oll an derivas a'n seythen ma dhe'n hwedhel ma awos y vos

pur a vri dhe bubonan ahanan.

Ni re dhewisas an konsel... ha lemmyn yma govynnow bras ow kregi a-wartha resek an korf ma.

Lemmyn yma lies person yn bys politegneth owth assaya dhe worra gwasketh warnodho may hyllyn dyski dhyworth an kammow.

Gwell via ragon mar pe henna dyskys kyns mis Ebryl a dheu.

**

Henn yw oll rag Nowodhow an Seythen ...bys nessa seythen... agas gweles.